



手機、守機，人手一支

從這佬多年大家換用智慧型手機後，屋下個電話就緊來緊少響咧，就伸八十零歲个阿姆成時會打電話喊佢轉老屋提菜、無就阿姑下把會打電話摺佢打嘴鼓定定！毋單淨打屋下電話个機會少忒盡多，連講手機个時間乜變短咧。因為，這下人用手指在手機面劃上劃下、點點仔，根本毋使講半句話，就做得摺字、圖、聲音、影片輕輕鬆鬆傳分幾十儕、幾百儕。自家个手機也做得隨時收著各方朋友傳來个消息，摺人聯絡變到盡利便。做得講，通信科技个發展摺人之間个關係拉兼咧，另外，乜做得講，係無用手机，摺人聯絡就會變成較麻煩。現下，除忒盡多歲个老人家摺盡細个細子以外，差毋多係儕儕有手機个程度咧！還過，手機越進步，功能越多，人就越倚恃手機、越守等手機，真經係「手機、守機，人手一支！」

這下手機个用途做得講係包山包海，想得著个、想毋著个通盤有，除忒講電話、傳消息、翕相……等一般个手機功能以外，日常生活不論時全做得利用著手機。晨早跔起，做得先睺手機个氣象預報，大約知今晡日个天時變化後，正來按算上班愛著麼个衫褲。出門坐高鐵做得毋使打車單，直接點出手機个電子車票，在入門口脣个驗票機影啊過，聽著「嗶」一聲，就做得入站坐車，下車後乜共樣，用手机「嗶」一下，就做得出車頭，環保又方便。今有盡多公司採用電子公文，員工係用手机來收發，就算主管還盲落到辦公室，也係去國外出差，還係做得運用手机來批公文、了解公司个運作，摺工作交代好勢，毋會宕著業務推行。放寮日，想駛車載全屋下人出去旅行，做得先參考手機个景點紹介、網友意見，再過睺地圖、設定路線。最好順續用手机注文旅舍、餐廳，摺歸個旅程安排好勢，到時去到景點，還做得用手机「打卡」，將遊寮个相片摺好心情傳分眾親朋好友。

手機个好處盡多，毋過，手機也會產生盡多問題，其中，「低頭族」就係最直接用來講該兜逐擺頭低低劃手機个人。這個詞除忒強調低頭个動作以外，還有一個盡重要个意思，就係點出該兜就顧劃手機，冷落身旁人事个人。有兜人，對手機裡背个朋友有講有笑，盡有聯絡，顛倒摺脣頭个同事、同學、屋下人講無幾句話，實際生活孤孤栖栖；有兜人使手機，低頭个時間忒長，造成目珠花、頸根硬鉸摺身體停動毋罇个健康問題。有兜學生，爽手機个時間忒久，暗晡頭無睡飽，第二日到學校無精神讀書，功課退步。總講，科技發展已經摺手機變成日常生活做毋得少忒个一部分，大家學習使用手機提供个各種新功能个時節，同時也愛學習仰般尋出自家運用手机个準則，正毋會分手機牽等行，也正做得保持自家个身體健康摺人際關係。

作者：林伯殷

☆詞彙學習☆

【下把】ha' ba'：偶爾。

【倚恃】rhi' shi'：信任依賴。

【不論時】bud' lun' shi：任何時間。

【跔起】tai ki'：起床。

【按算】on' son'：事先預估。

【宕著】tong' do'：延宕。

【注文】zhu' vun：事先預訂。

【低頭族】de' teu' cug：低頭族。

【孤孤栖栖】gu' gu' si' si'：孤孤單單。

【硬鉸】ngang' gau'：僵硬不動的樣子。